

Mid-Day Dogri News Bulletin, 03rd May 2025

समे — 12:25

<><><><><><>

Angola President Visit

अंगोला दे राष्ट्रपति जोआओ मनुएल गोजाल्वेस लोरेसो हुंदा अज्ज बडलै राष्ट्रपति भवन दे बेहड़े च रस्मी तौरा पर सुआगत कीता गेआ। राष्ट्रपति द्रौपदी मुर्मू ते प्रधानमंत्री नरेन्द्र मोदी होरें आपूं उंदा सुआगत कीता। अंगोला दे राष्ट्रपति होरें मगरा राष्ट्रपिता महात्मा गांधी हुंदी समाधि राजघाट पर जोइयै उनेंगी श्रद्धांजलि बी भेंट कीती। अज्ज उंदा प्रधानमंत्री मोदी हुंदे कन्नै शिष्टमंडल सतह दी मलाटी दा बी कार्यक्रम ऐ। अज्ज गै राष्ट्रपति होरें उनेंगी रातीं दी रूट्टी पर साददा दित्ते दा ऐ। राष्ट्रपति हुंदे अलावा उंदा विदेश मंत्री डॉ. एस.जयशंकर ते सेहत मंत्री जे.पी.नड्डा हुंदे नै बी मलाटी करने दा कार्यक्रम ऐ।

पलैश:- हुनै हुनै थोई दी जानकारी मूजब राष्ट्रपति लोरसो नमीं दिल्ली दे हैदराबाद हाउस पुज्जी गे न ते प्रधानमंत्री नरेन्द्र मोदी हुंदे नै उंदी गल्लबात शुरू होई गई ऐ। मेद कीती जा'रदी ऐ जे गल्लबात दे बाद दौनें मुल्खें बश्कार राई-बाई, इलाज दे देसी तरीके पद्धतिएं ते कला ते संस्कृति दे क्षेत्र च समझौते होई सकदे न।

<><><><><><>

Waves

मुंबई च चलै करदे वर्ल्ड आडियो विजुअल एंड एंटरटेनमेंट समिट वेक्स 2025 दे त्रीए ध्याड़े अज्ज समुदायिक रेडियो पर राष्ट्रीय सम्मेलन दा सरिस्ता कीता जा'रदा ऐ। जेहूदे च नमें रूझाने, तौर तरीके, नीतिएं ते कार्यक्रमें बारे बचार बटांदरा कीता जाग। एहदा मकसद समुदायिक रेडिया राएं लोकें गी जागरूक ते सशक्त बनाना ते मकामी समुदाय कन्नै मते बेहतर ते असरदार ढंगै सिर जुड़ने दी छमता च बाद्धा करना ऐ। सूचना ते प्रसारण राज्य मंत्री एल.मुरुगन होर अज्ज वेक्स शिखर सम्मेलन च अपनी किस्मै दा पैहला पैहला श्वेत पत्र जारी करगंन जिसी विषय दित्ता गेदा ऐ " इंडिया'ज लाइव इवेंटस इकोनोमी, ए स्ट्रेटेजिक ग्रोथ इम्पेरेटिव"। इस श्वेत पत्र राएं भारत दे तेजिया कन्नै फैला करदे लाइव मनोरंजन उद्योग दा व्यापक जायजा पेश करने दे कन्नो कन्नी नमें रूझाने, सामरिक सफारशें विकास दी रफ्तार ते सभावनाएं दे बारे च तफसीली चर्चा कीती जाग।

<><><><><><>

LoC Firing

भारती सेना नै कल रातीं कब्जा रेखा पर पाकिस्तानी सेना आस्सेआ कीती गेदी गोलीबारी दा असरदार तरीके कन्नै परता दित्ता। रक्षा सूत्रें दस्सेआ जे पाकिस्तानी सेना नै केन्द्र शासत जम्मू कश्मीर दे कुपवाड़ा, उड़ी ते अखनूर सेक्टरें च कब्जा रेखा पर बिजन कुसै उकसावे दे लौहके थेआरें कन्नै गोलीबारी कीती जेह्दा भारती सेना नै पूरी तगड़ेयाई कन्नै बनकदा परता दित्ता।

<><><><><><>

JK Govt. Yuva

जम्मू कश्मीर सरकार नै मिशन युवा दे तैह्त्त जिला स्तर पर लौहके बपार विकास इकाइएँ ते उप-मंडल स्तर पर बपार हेल्प डेस्क दी स्थापना गी मंजूरी देई दित्ती ऐ। इंदे नै पूरे केन्द्र शासत प्रदेश च युवा उद्यमिऐं गी समर्थन ते मार्गदर्शन होसल होग। बपार विकास इकाइयां ते बपार हेल्प डेस्क उपयोगिता कन्नै सरबंघत मदाद, सलाह मशवरा ते सरकारी योजनाएं तगर सखल्ली पुज्ज प्रदान करियै मिशन युवा दी असरदार ढंगै सिर अमलावरी गी सुविधा जनक बनांगन। एह्दे नै नोजवान उद्यमशीलता गी बढ़ावा मिलने ते पूरे जम्मू कश्मीर च जमीनी सतह पर आर्थिक विकास गी बढ़ावा मिलने दी मेद ऐ।

<><><><><><>

DC Reasi Healthcare

रियासी दियां जिला विकास कमीशनर निधि मलिक होर कल इक बैठक सद्दिदयै जिले लेई सेह्त्त मैह्कमे दे प्रमुख कार्यक्रमें दा जायजा लैता। बैठक च मुख् तौरा पर गल्लबात पठेयाली महिलाएं दी दिक्खभाल, बच्चेन दी जन्म कोला पैह्ले ते जन्म दे बाद आली दिक्खभाल, अस्पतालें च यचगी कराने ते राश्ट्रीय बाल स्वास्थ्य कार्यक्रम तैह्त्त कुसै बी बमारी दा शुरू च गै पता लाई लैने पर जोर दित्ता गेआ। डीसी होरें जिले दे दूर दरेड़े इलाकें जियां माहोर ते पौनी बगैरा च लोके गी घरे च यचगी नेई कराइयै उनेंगी एह्दे लेई अस्पतालें च आहन्नने लेई प्रेरत करने पर जोर दित्ता ते इस बारे म्हीने म्हीने दा आंकड़े तैआर करने लेई बी आखेआ। एह्दे इलावा बच्चेन दे टीकाकरण, गर्भवति महिलाएं दे नां दर्ज

करने ते टर.बी मुक्त भारत दा लक्ष्य लेइयै शुरू कीते गेदे 100 दिनें दे टी.बी. रोकथाम अभियान बारे बी चर्चा कीती।

<><><><><><>

Gyanpath-Design

स्वतंत्रता दिवस समारोह 2025 दे हिस्से दे तौरा पर रक्षा मंत्रालय आसेआ MyGov दे सहयोग कन्नै पैहली थमां 15 मई तगर ज्ञानपथ दे डिजाइन लेई प्रतियोगिता दा आयोजन कीता जा'रदा ऐ। एहदा मकसद युवाएं ते जनता च देशभक्ति दी भावना गी बल देना ऐ। प्रतिभागियें गी लाल किले च एनसीसी कैडेटें, एनएसएस दे स्वयंसेविएं ते स्कूलें दे बच्चें आसेआ बनाए जाने आहले फार्मेशनें गी डिजाइन करना होग। पैहले त्रौनें जेतुएं गी 10 ज्हार रपे जिसले के पहले 250 प्रतिभागियें गी ई निमंत्रण पत्र थ्होग तां जे ओह अपने इक साथी कन्नै इस समारोह दे साक्षी बनी सकन। डिजाइनें गी MyGov दे दिशा-निर्देशों दी पालमा करनी होग।

<><><><><><>

Handicraft-Awards

कपड़ा मंत्रालय दे दस्तकारिएं सरबंधी विभाग दे विकास कमिशनर हु'दे दफतरै बड़ी मती प्रतिष्ठा आहले राष्ट्री दस्तकारी अवार्ड 2024 लेई आवेदन मंगे न। 30एं ब'रें जां फही ओह्दे थमां बद्ध उम्री दे कारीगर ते घट्टोघट्ट 10एं ब'रें दे तजुर्बे आहले कारीगर इस राष्ट्री अवार्ड लेई आवेदन करी सकदे न। इससै चाल्ली 20एं ब'रें तगर दे तजुर्बे आहले ओकड़े कारीगर जि'दी उम्र 50एं ब'रें जां ओह्दे शा मती ऐ, ओह शिल्प गुरु अवार्ड लेई आवेदन करी सक³न। मंत्रालय आसेआ कुल 25 पुरस्कार भेंट कीते जा³न जि'दे चा 6 शिल्प गुरु अवार्ड ते 19 राष्ट्री अवार्ड हो³न। आवेदन जमा करोआने दी खीरी तरीक 12 मई ऐ। इच्छुक कारीगर, एहदे लेई अखनूर रोड जम्मू च स्थित हैंडीक्राफ्ट सर्विस सेंटर कन्नै राबता करी सकदे न जां फही वैबसाईट www-handicrafts-gov-in पर जाइयै मती जानकारी लेई सकदे न। योग्यता मानदंड, दिशा निर्देश ते होर दुए ब्यौरे इस वैबसाईट उपपर उपलब्ध न।

<><><><><><>